

**DRAF TEKS UCAPAN
NAIB CANSOLOR
UNIVERSITI TEKNIKAL MALAYSIA MELAKA**

sempena

**MAJLIS PERASMIAN PENUTUP
KURSUS PERSEDIAAN PEMIMPIN PELAJAR UTeM**

*13 Februari 2011 (Ahad), 12.00 tengah hari
Samudera Bidara Resort, Tg. Bidara, Melaka*

1

Bismillahirrahmanirrahim

Assalammualaikum wrt wbt.

Terima kasih Pengacara majlis

Y.Bhg. Engr. Prof. Dr. Marizan bin Sulaiman
Dekan Hal Ehwal Pelajar & Alumni

Para pegawai, warga HEPA, barisan Mantan Exco Majlis Perwakilan Pelajar(MPP) sesi 2009/2010, serta bakal-bakal calon pemimpin pelajar yang saya hormati sekalian.

Syukur alhamdulillah, dengan limpah dan inayah Allah SWT kita dapat berhimpun pada pagi ini di dalam satu

2

program yang sememangnya diadakan khas untuk bakal-bakal calon majlis perwakilan pelajar sesi 2010/2011 ini. Semoga Kursus Persediaan Pemimpin Pelajar ini mendapat keberkatan dan keredhaan dari Allah S.W.T. jua.

Saudara saudari yang dikasihi sekalian,

Kursus persediaan pemimpin pelajar ini merupakan suatu inisiatif bagi memberi pendedahan awal kepada calon bermula daripada perjalanan pemilihan MPP, sehinggalah kepada persediaan untuk menjadi ahli majlis perwakilan pelajar itu sendiri. Kursus sebegini sememangnya sangat penting bagi memastikan bakal-bakal calon sekalian

3

membuat persediaan rapi yang secukupnya sebelum bergelar sebagai ahli MPP.

Bakal-bakal calon pemimpin pelajar yang saya hormati sekalian,

Golongan mahasiswa pada hari ini adalah golongan yang bakal memimpin dan menerajui negara pada masa hadapan. Baik atau buruknya corak pemerintahan dan pembangunan negara pada masa akan datang adalah bergantung kepada golongan mahasiswa ini. Justeru, misi untuk melahirkan bakal pemimpin yang mampu memacu negara ke tahap yang lebih cemerlang adalah satu misi

4

yang sangat penting dan menjadi tanggungjawab kita semua untuk merealisasikan.

MPP merupakan salah satu platform terbaik untuk melahirkan golongan mahasiswa yang mampu menjadi pemimpin negara kelak. Pemimpin harapan rakyat adalah pemimpin yang mampu menjalankan tanggungjawab memimpin dan menerajui negara dengan baik. Tugas dan tanggungjawab sebagai seorang pemimpin ini amat besar. Penuh dengan pelbagai dugaan, cabaran, memerlukan kekuatan fizikal dan mental, mendambakan pengorbanan dan keikhlasan sebenar, dan yang terpenting adalah ia memerlukan ilmu dan pengetahuan yang tinggi. Justeru, selaku bakal pemimpin negara, mahasiswa mahasiswi sekalian perlulah membuat persediaan secukupnya, dan

5

terus mengasah bakat kepemimpinan supaya apabila sudah tiba masanya, anda benar-benar bersedia untuk memimpin dan menerajui negara. Tanpa persediaan yang rapi dan secukupnya, anda tidak akan mampu untuk menjadi pemimpin yang baik, dihormati, disegani, dan dikasihi rakyat, sekali gus hasrat memacu negara ke satu tahap yang lebih tinggi tidak akan tercapai kerana tidak mendapat sokongan daripada rakyat.

Pada hari ini, kita memang memerlukan seorang pemimpin yang baik, tidak kira sama ada untuk memimpin Organisasi, Universiti, mahupun Negara. Jadi saya berasa berbesar hati dan gembira melihat kesudian dan keberanian saudara-saudari sekalian hadir ke kursus ini dan menawarkan diri untuk menjadi calon-calon majlis

6

perwakilan pelajar. Saya yakin, anda yang berada di hadapan saya ini adalah wajah-wajah pemimpin yang berupaya menjadi seorang pemimpin yang baik, dihormati, disanjung, dan dikasihi oleh sekalian warga UTeM. Kesungguhan dan kegigihan saudara saudari mengharungi pengalaman yang singkat ini, saya yakin dan pasti, akan menjadi suatu pengalaman yang sangat berharga untuk diaplikasikan sebagai seorang pemimpin pada masa hadapan.

7

Mahasiswa mahasiswi yang dikasihi sekalian,

Sebagai seorang bakal pemimpin pelajar, anda perlulah mempunyai hala tuju yang jelas. Pemimpin harus tahu apakah matlamat dan tujuan mereka memimpin sesebuah organisasi atau orang di bawahnya itu. Hala tuju yang jelas memainkan peranan yang sangat penting untuk memacu mereka yang dipimpinnya selaras dengan matlamat organisasi atau kesatuan. Jadi di sinilah letaknya peranan pemimpin untuk memastikan mereka mempunyai hala tuju yang jelas, dan dalam konteks majlis perwakilan pelajar, hala tujunya mestilah selaras dengan hala tuju universiti agar segala perancangan universiti

8

untuk menyumbang kepada pembangunan dan kecemerlangan pelajar berjaya di laksana.

MPP juga memainkan peranan yang sangat penting dalam menjadi penghubung di antara Pihak Pengurusan Universiti dan para pelajar. MPP perlulah mengenal pasti dan mendengar permasalahan yang dibangkitkan oleh pelajar, terutamanya yang berkaitan dengan kebajikan dan keperluan mereka untuk disuarakan kepada Pihak Pengurusan Universiti. Walau bagaimanapun, MPP harus bijak untuk menilai dan mengenal pasti sebarang isu yang dibangkitkan agar tidak menimbulkan sebarang salah faham dan permasalahan di antara kedua-dua belah pihak.

9

Akhir kata, saya mendoakan agar segala perancangan dan tugas kita berjalan dengan baik sebagaimana yang dirancang. Semoga segala hasrat kita untuk melahirkan golongan pemimpin negara yang baik pada masa hadapan ini akan diberkati dan dirahmati Allah S.W.T..

Sekian, wabillahi taufiq wal hidayah wassalamualaikum warahmatullahi wabarakatuh.

10